

आकाशवाणी

खबरां ----

1 उत्तराखंड दे अलमोडा जिले दे सुल्त इलाके च अज्ज बड्डलै होए दे इक दर्दनाक बस हादसे च घट्टोघट्ट 36 जनें मारे गे ते 19 दुए जख्मीं होई गए। राष्ट्रपति द्रौपदी मुर्मू ते प्रधानमंत्री नरेंद्र मोदी होरें इस हादसे पर दुख जाहिर कीता ऐ।

2 कनाडा दे हिंदू सभा मंदरें च अतवादिएं आसेआ कीती गेदी हिंसक कार्यवाही दी भारत नै निंदेआ कीती ऐ।

3 अमरीका कल अपने 47में राष्ट्रपति लेई मतदान करोग। रिपब्लिकन मेदवार ते साबका राष्ट्रपति डोनाल्ड ट्रम्प ते डेमोक्रेटिक मेदवार ते उप-राष्ट्रपति कमला हैरिस मझाटै राष्ट्रपति दे ओहदे लेई सख्त मुकाबला ऐ।

4 उप-राष्ट्रपति होरें आखेआ जे नमें आपराधिक कनूनें भारती आपराधिक न्यास सरिस्ते गी उपनिवेशवाद आहली विरासत थमां आजाद करी ओड़ेआ ऐ।

5 नमीं ते अक्षय उर्जा मैहकमे दे मंत्री प्रहलाद जोशी होरें अजज आखेआ जे भारत नै स्थापित सौर उर्जा च 90 गीगावाट दी समर्थ हासल करी लेई ऐ ते 2030 तगर 500 गीगावाट अक्षय उर्जा समर्थ हासल करने आहले लक्ष्य वल बधा'रदा ऐ।

<><><><><><>

Uttrakhand-Accident

उत्तराखंड दे अल्मोडा जिले दे कूपी च अज्ज बड्डलै इक बस डूंगी खाई च जाई पौने करी घट्टोघट्ट 36 लोकें दी मौत होई गई ते 19 होर घायल होई गए न। एह बस पौड़ी दे नैनीडांडा थ्वां रामनगर जा रदी ही ते एहदे च 55 यात्री सोआर हे। मौके पर राहत ते बचा कम्म जारी ऐ। राज्य आपदा मोचन बल, राश्ट्रीय आपदा मोचन बल, पुलस ते मकामी प्रशासन दे दल घटना आहली थाहर पर सक्रियता कन्नै बचा अभियान चला रदे न। प्रधानमंत्री नरेंद्र मोदी, उत्तराखंड दे राज्यपाल गुरमीत सिंह ते मुखमंत्री पुष्कर सिंह धामी होरें इस हादसे पर डूंगा दुख जाहिर कीता ऐ। मुखमंत्री होरें गंभीर तौर पर घायल लोकें गी हैलीकाप्टर थ्वां अस्पताल पजाने दे निर्देश दितें उनें कुमाऊ

मंडल दे आयुक्त थ्वां इस घटना आस्तै मजिस्ट्रेट जांच कराने लेई
आखेआ।

<><><><><><>

President-PM Almora

राष्ट्रपति द्रौपदी मुर्मू ते प्रधानमंत्री नरेंद्र मोदी होरें उत्तराखंड दे
अलमोडा च होए दे बस हादसे पर दुख ते बसोस जाहिर कीता ऐ।
राष्ट्रपति होरें इक सोशल मीडिया पोस्ट च आखेआ जे एह बड़ी गै
दुखद घटना ऐ जेदे च महिलाएं ते बच्चें सने इन्ने सारे लोकें दी जान
गेई ऐ। राष्ट्रपति होरें सोगी परोआरें प्रति अपनियां संवेदना जाहिर
कीतियां ते घायलें दे तौले नरोए होने दी कामना कीती। प्रधानमंत्री
होरें शिड़क हादसे च अपने परोआर आहलें गी मुहाने आहले लोकें प्रति
संवेदना जाहिर कीती। प्रधानमंत्री होरें मारे गेदे हर व्यक्ति दे नेड़में
रिश्तेदार गी प्रधानमंत्री राष्ट्रीय राहत कोष थ्वां 2 लक्ख रपे दी सींधी
सहायता ते घायलें गी 50 जहार रपे देने दी घोषणा कीती।

<><><><><><>

Canada

भारत नै कनाडा दे इक मंदर च चरमपंथिएं ते अलगाववादिएं आसेआ कीती गेदी हिंसा दी निंदेआ कीती ऐ ते इस घटना पर इंगी चिंता जाहिर कीती ऐ। विदेश मंत्रालय दे प्रवक्ता रणधीर जयसवाल होरें कनाडा सरकार गी आखेआ जे ओह सारी पूजा आहली थाहें गी इस चाल्ली दे हमलें थां बचा। भारत गी मेद ऐ जे कनाडा सरकार हिंसा च शामिल लोकें पर मुकदमा चला। ओटावा च भारतीय उच्चायोग नै ऑंटारिया च वाणिज्य दूतावास शिविर दे बाहर आहली घटना पर निराशा जाहिर कीती। उच्चायोग नै आखेआ जे टोरंटो कश हिंदू सभा मंदर दे कन्नै सह आयोजित वाणिज्य दूतावास शिविर दे बाहर भारत विरोधी तत्वे आसेआ हिंसक व्यवधान पाया गेआ।

<><><><><><>

Bittu-Canada

केंद्री मंत्री रवनीत सिंह बिट्टू होरें कनाडा च मंदर ते इक धार्मिक थाहरै पर होए दे हमले दी सख्त निंदेआ कीती ऐ। अपनी इक सोशल मीडिया पोस्ट च बिट्टू होरें दोष लाया जे कनाडा दे प्रधानमंत्री जस्टिन ट्रूडो होरें अपनी गंदी राजनीति तैहत कनाडा च रौहने आहले भारतीय मूल दे लोकें बशकार बंड पोआई ऐ। उनें आखेआ जे भारत च

हिंदू ते सिख भाईचारे ते सद्भाव कन्नै रौहने पर कनाडा च उनेगी
इक दुए खलाफ भड़काया जा करदा ऐ।

<><><><><><>

PM-bhasha

प्रधानमंत्री नरेंद्र मोदी होंरें इस म्हीने दी 3 थवां 9 तरीक तगर असम
च मनाए जांरदे भाशा गौरव सप्ताह आस्तै राज्य दे लोकें गी
शुभकामनां दितियां न। प्रधानमंत्री होंरें भाशा गौरव सप्ताह बारै च
असम दे मुखमंत्री हेमंत बिसवा सरमा हुंदी इक पोस्ट गी सांझा
करदे होई आखेआ जे एह हफ्ता असमी भाशा गी शास्त्रीय भाशा दा
दर्जा दिते जाने पर असम दे लोकें दे उत्साह दा प्रतीक ऐ। उनें
आखेआ जे इस हफ्ते दौरान आयोजित कीती जाने आहली गतिविधिएं
कन्नै राज्य दे लोकें ते असमी संस्कृति दे बशकार सरबंध मजबूत
होग। भाशा गौरव सप्ताह दा मकसद असम दी भाशाएं दी विविधता
ते विरासत गी लोकें कन्नै सांझा करना ऐ।

<><><><><><>

US-Prez. Polls

अमरीका च 47में राष्ट्रपति दे चुनां आस्तै कल मतदान होग जेदे च रिपब्लिकन मेदवार डोनाल्ड ट्रम्प ते डेनोक्रेटिक नेता कमला हैरिस बशकार जबरदस्त मुकाबला होने दी मेद ऐ। इस चुनां गी व्हाई हाउस आस्तै पिछले किश दहाकें च होए दे सब्बनें थ्वां करीबी मुकाबलें चा इक मन्नेआ जा'रदा ऐ। दौनें मेदवारें खास करिए प्रमुख स्विंग राज्यें च मतदाताएं गी अपनी भेठा करने आस्तै कोई कसर नेई छोड्दी जा'रदी ऐ। चुनां च जित आस्तै मेदवार गी 270 इलेक्टोरल कालेज वोटें दी लोड़ हुंदी ऐ। ताजा जनमत सर्वेक्षणें मूजब चुनां च हार जित 7 महत्वपूर्ण राज्यें एरिजोना, नेवादा, विस्कान्सिन, मिशिगन, पेंसिल्वेनिया, उत्तरी कैरोलिना ते जार्जिया दे चुनावी नतीजें पर निर्भर करोग।

<><><><><><>

Jaishankar Australia

विदेश मंत्री डाक्टर एस. जयशंकर होरें अज्ज ब्रिसबेन च भारत दे नमें महावाणिज्य दूतावास दा उद्घाटन कीता। डॉ जयशंकर होरें इस मौके पर आखेआ जे एह राजदूती दफ्तर क्वींसलैंड दे कन्नै भारत दे सरबंधें गी तगड़ा बनाने, बपार बधाने, शैक्षणिक संपर्क दा विस्तार करने ते

भारती मूल दे लोकें गी सुविधा पुजाने च जोगदान देग। उनें इसी भारत ते ऑस्ट्रेलिया दे लगातार मजबूत हुंदे दपक्खी सरबंधें च मील दा पत्थर करार दिता। विदेश मंत्री होरें आखेआ जे इस सफारतखाने कन्नै प्रधानमंत्री नरेन्द्र मोदी हुंदा ऑस्ट्रेलिया च रौहने आहले भारती समुदास दे लेकें कन्नै पिच्छले बरें कीता गेदा वायदा पूरा होई गेआ ऐ। जयशंकर होरें क्वींसलैंड दिएं गवर्नर डॉ. जीनेट यंग हुंदेरै बी मलाटी कीती। बैठक दे दरान दौनें नेताएं भारत ते क्वींसलैंड बशकार आर्थिक, बपार ते निवेश सैहयोग गी तगड़ा बनाने दक नमें मौकें ते तरीकें पर चर्चा कीती।

<><><><><><><>

VP-IIIPA

उपराश्ट्रपति जगदीप धनखड़ होरें आखेआ जे लोक प्रशासन कन्नै जुड़े दे लोकें गी राष्ट्रवाद दे मुल्ल प्रति प्रतिबद्ध होना लोड़चदा ऐ। विकसित ते इकजुट भारत दे विश्वास कन्नै ते बगैर कुसै डर ते पक्खपात दे आम लोकें दी सेवा करने दी उनें गल्ल आक्खी। ओह अज्ज नमीं दिल्ली च भारतीय लोक प्रशासन संस्थान दी आम सभा दी 70मीं सलाना बैठक गी संसबोधित करा रदे हे। धनखड़ होरें आखेआ जे मुख्य तेजी कन्नै औपनिवेशक मानसिकता गी छोड़ा करदा

ऐ। उनें आखेआ जे डेटा समाज दी जरूरतें दा आंकलन करने दा बुनियादी आधार ऐ।

<><><><><><>

CDS-Algeria

भारत ते अल्जीरिया नै अज्ज दपक्खी रक्षा सहयोग पर समझौता ज्ञापन पर दस्तखत कीते। एहदे कन्नै दौनें मुख्य बश्कार रक्षा सांझेदारी ते रणनीतिक हितें गी बढ़ावा थोग। सेना ते अधिकारिणं दी मौजूदगी च चीफ ऑफ डिफेंस स्टाफ जनरल अनिल चौहान ते पीपल्स नेशनल आर्मी दे चीफ आफ स्टाफ सईद चनेगृहा होरें समझौते पर दस्तखत कीते। दपक्खी सैन्य सहयोग गी बढ़ावा देने आस्तै मेक इन इंडिया ते टेक्नोलॉजी दे आदान प्रदान पर बी चर्चा होई।

<><><><><><>

ECI-By Polls Date

चुनां आयोग नै केरल, पंजाब ते उत्तर प्रदेश दे 14 विधानसभा क्षेत्रें च उप चुना दी तरीक बदलने दी घोशणा कीती ऐ। इनें राज्यें च हून मतदान 13 नवंबर दी थाहर 20 नवंबर गी होग। इनें 14 निर्वाचित क्षेत्रें च केरल दे पलक्कड़, पंजाब दे ़ेरा बाबा नानक, चब्बेवाल,

बरनाला ते उत्तर प्रदेश दे मीरापुर, कुंदरकी गाजियाबाद, खैर, करहल, शीशमऊ, फूलपुर, कटेहरी ते मझवान शामिल ऐ। वोटें दी गिनतरी दी तरीक च कोई बदलाव नेई कीता गेआ ऐ। वोटें दी गिनतरी 23 नवंबर गी होग।

<><><><><><>

PM-Jharkhand

प्रधानमंत्री ते भाजपा दे वरिष्ठ नेता नरेंद्र मोदी होरें हेमंत सोरेन हुंदी अगुवाई आहली सरकार पर 5 बरे दे कार्यकाल दौरान झारखंड दी जनता गी धोखा देने दा आरोप लाया ऐ। झारखंड मुक्ति मोर्चा, कांग्रेस ते राष्ट्रीय जनता दल बारै बोलदे होई उनें आखेआ जे इनें लोकें कन्नै झूठे वायदे कीते। एह गल्ल उनें झारखंड च गढ़वा दे चेतना मैदान च चुनावी रैली गी संबोधित करदे होई आखी। उनें आखेआ जे बीजेपी झारखंड दी सुरक्षा, स्थिरता ते समृद्धि दी गरंटी कन्नै चुना मैदान च उतरी ऐ। मोदी होरें आखेआ जे झारखंड च तुष्टिकरण दी राजनीति चरम पर ऐ ते जेकर इयां गै जारी रेआ तां एह आदिवासी समाज ते मुख्य दौनें आस्तै खतरा पैदा करोग।

<><><><><><>

Joshia ISA

नमीं ते अक्षय ऊर्जा दे केन्द्री मंत्री प्रल्हाद जोशी होरें अज्ज आखेआ जे भारत नै बरें 2030 तगर 500 गीगावाट नवीकरणी ऊर्जा समर्थ हासल करने दे अपने लक्ष्य चा 90 गीगावाट सौर समर्थ स्थापित करी लैती ऐ। जोशी होर नमीं दिल्ली च अंतर्राष्ट्री सौर गठबंधन दे 7में इजलास दे उद्घाटन समारोह गी संबोधित करै करदे हे। उनें आखेआ जे सरकार नै 37 इशारिया 5 गीगावाट दी नवीकरणी समर्थ आहले 50 सौर पार्क गी मंजूरी दिती ऐ। उनें आखेआ जे इस बरें आलमी सतह दे सौर उर्जा खेतर दे तकरीबन 2 टेरावाट स्थापित सौर फोटोवोल्टिक समर्थ तगर पुज्जी जाने दी पूरी संभावना ऐ। इस वर्ष अंतर्राष्ट्री सौर गठबंधन दा सम्मेलन भारत दी अध्यक्षता ते फ्रांस दी सह-अध्यक्षता च आयोजित कीता जा'रदा ऐ। सम्मेलन च सदस्य देशें दे सीमित ऊर्जा आहले खेतरें च सौर ऊर्जा दी स्थापना च तेजी आहनने दे तरीकें दे बारें च मुख् रूप कन्नै चर्चा कीती जाहग।

<><><><><><>

Add Joshi

मंत्री होरें आखेआ जे आई.एस.ए दा मकसद 2030 तगर सौर उर्जा हल आस्तै इक जहार अरब डालर दा निवेश कीते जाने दी लोड़ ऐ।

जोशी होरें घोशणा कीती जे आई.एस.ए नै आशीश खन्ना होरें गी
अपना नमा महानिदेशक चुनेआ ऐ। आकाशवाणी कन्नै खास गल्लबात
च आई.एस.ए दे इक प्रदर्शक नै नां छड़ा भारत च सगुआं विश्व सतह
पर उत्पादें गी प्रदर्शित करने आस्तै इक मंच प्रदान करने आसतै
असंबली दे जत्नें दी सराहना कीती।

<><><><><><>

Tourism London Event

सैलसफा मंत्रालय कल्लै थ्वां लंदन च शुरू होआ रदे वर्ल्ड ट्रेवल मार्केट
लंदन च हिस्सा लैग। त्रै दिन तगर चलने आहले इस अंतरराष्ट्रीय
यात्रा ते सैलसफा दे आयोजन दा समापन 7 नवंबर गी होग। इस
आयोजन च हिस्सा लैने आहले राज्य सरकारें, टूर आपरेटरें, विमानन
सेवाएं ते होटल उद्योग दे प्रतिनिधिएं सने 50 व्यक्तिएं दा इक दल
हिस्सा लै रदा ऐ। आयोजन च भारतीय मंडप च संस्कृति भाशा ते
रिवायतें दा प्रदर्शन कीता जाग। इस बरे दा मुख केंद्र ब्याह शादिएं
सरबंधी सैलसफा, सम्मेलन ते प्रदर्शनिं ते महाकुम्भ दा आयोजन ऐ।

<><><><><><>

Railways Special Trains

छठ पूजा दे मद्देनज़र भारती रेलवे आसेआ अज्ज मुल्खै दे बक्ख-बक्ख हिस्सें लेई 185 विशेष रेलगड्डियां चलाईयां जा करदिआं न। अज्ज दिल्ली एनसीआर थमां मुल्खै दे बक्ख-बक्ख हिस्सें लेई 25 विशेष ध्यारी रेलगड्डियां बी चलाईयां जा करदिआं न। इंदे च सहरसा, वाराणसी, अयोध्या, लखनऊ, पटना, मुजफ्फरपुर, गोरखपुर, प्रयागराज, दरभंगा, इन्दौर ते थिरुवनन्तपुरम स्टेशन शामिल न। आकाशवाणी खबरें कन्नै गल्ल करदे होई उत्तर रेलवे दे जन सम्पर्क अधिकारी हिमांशु शेखर उपाध्याय होरें आखेआ जे नियमित रेलगड्डिएं दे अलावा रेलवे आसेआ विशेष ध्यारी रेलगड्डियां बी चलाईयां जा करदिआं न तांजे लोक बिजली कुसै दिक्कत परेशानी दे छठ पूजा लेई अपनी तय थाहें तकर पुज्जी सकन। रेलवे बोर्ड दे अध्यक्ष सतीश कुमार होरें जंदी रातीं नमीं दिल्ली रेलवे स्टेशन दा दौरा लाइयै उत्थे जातरिएं लेई उपलब्ध सुविधाएं दी समीक्षा कीती। रेलवे आसेआ पिच्छले म्हीने दी पैहली तरीक थमां लेइयै इस म्हीने दी 30 तरीक तगर 7 जहार विशेश रेलगड्डियां चलाईयां जा'रदिआं न।

<><><><><><>

Assembly-JK

नमैं बने दे जम्मू-कश्मीर केंद्र शासित प्रदेश दी पैहली-पैहली असैम्बली दा पैहला-पैहला इजलास अज्ज श्रीनगर च शुरू होआ जेहड़ा 5 दिनें तोड़ी चलोग। अज्ज पैहले रोज अपने संबोधनै च लेफ्टिनेंट गवर्नर मनोज सिन्हा होरें अज्ज जम्मू-कश्मीर केन्द्र शासित प्रदेश दी असैम्बली गी संबोधित कीता ते इस मौके उनें प्रदेश च मुकामी विकास ते कल्याण गी बढ़ावा देने आहिलें केईं पैहलकदमिं दी घोषणा कीती। उनें आखेआ जे कश्मीर गी रेल राहें मुख्यै दे बाकी हिस्सें कन्नै जोड़ने दा कम्म तौले गै पूरा होने आहला ऐ। उनें आखेआ जे सरकार योग्य परोआरें गी 200 युनिट बिजली मुफ्त करोआग। एहदे अलावा उनें प्रदेश च 46 नमैं औद्योगिक एस्टेट विकसित करने दिं योजनां दा बी जिक्र कीता जेहदेनै प्रदेश दे औद्योगिक खेतर दा विस्तार जकीनी बनोग। उनें आखेआ जे सरकार मुकामी कारीगरें गी सशक्त बनाग ते हत्थखड्डी सैक्टर गी पक्क गै उबड़ा चुक्केआ जाहग। एलजी होरें जम्मू-कश्मीर दा राज्य दा दर्जा बहाल करने दी दिशा च कम्म करने दा बी वायदा कीता। एहदे शा पैहले सदन च उसलै हंगामे आहली स्थिति बनी गई जिसलै पीडीपी

दे विधायक आसेआ दफा370 हटाए जाने दे खलाफ प्रस्ताव सदन च पेश कीता गेआ। एहदे पर बीजेपी दे सदस्येँ त्रिक्खी प्रतिक्रिया दिती।

<><><><><><>